


AI, ENE!

Ezarritako bidea jarraitu ez duen arbola

Oker irten zen zuhaitzarena ala hesia egin zuen langilearena; zeinena da argazkiko egoera zentzugabearen errua? www.facebookfails.es



AHOBERO

"Nire mutilak kalera aterako ditut emakumeak bortxatu ditzaten"

TAPAS PAL | INDIAKO POLITIKARIA

Tamalez, azkenaldian ohikoak bihurtu dira Indian emakumeek jasaten dituzten bortxaketen inguruko albisteak. Baina Tapas Pal diputatuak bere arerio politikoei mehatxu egiteko erabilitako hitzok entzunda, ez dirudi agintariei gehiegi inporta zaienik. www.elmundo.es

EGURALDIA



Max. 19°

Min. 13°

Goizean zaparradak botako ditu, arratsaldean aldiz, atertza egingo du. euskalmet.net

ASTELEHENKOA

goiena

2014-07-07

HAMARREKOA

Jon Arretxe Arbizun bizi den idazle bizkaitarrak nobela beltza eta bidaiaria literatura landu ditu gehienbat eta 'Hutsaren itzalak' kaleratu du orain gutxi, berriz ere Toure ikertzailea protagonista duen liburua | TXOMIN MADINA

"Bisitatu nahi izan ditudan leku guztiak bisitatu ditut"

1. Zer kontatu gura izan duzu Toure protagonista duen hirugarren liburu honetan?

Sagako aurrekoekiko guztiz ezberdina den nobela bat egin gura izan dut. Lehena, *19 kamera*, dokumentalagoa zen; *612 euro*-n, umorearen alde egin nuen; eta azken hau beltzena da, gordinena, gogorrena.

2. Oraindik ezagutzen ez duenari, nola azaldu nor den Toure?

Bilboko San Frantzisko auzoko *patera pisu* baten bizi den afrikarra da. Iruzurti hutsa den arren, igarle boteretsua dela esango du, eta gero, pixkanaka, detektibe antzerako zerbait bihurtuko da.

3. Hain berezia den pertsonaia sortzeko, zein da lehen urratsa?

Orijinala izan gura nuen, horregatik bururatu zitzaidan gure artean bizi den afrikarra izatea. Gordinetasuna eta umorea uztartuz, pertsonaia sinpatiko bat sortzen saiatu nintzen. Asko estimatzen dut Toure, beragan sinesten dut.

4. Nobela beltzaz gain, bidaiaria literatura lantzea ere gogoko duzu.

Lehen, nire liburu denak ziren era horretakoak eta nobela beltzarekin hastean ere, bidaiaria nobela beltzak ziren, atzerrian kokatzen nituen-eta. Azkenek ere ukitu hori dute: San Frantzisko Afrika txikia da.

5. Etxetik mugitu gabe bidaiatzeko liburu bat gomendatzekotan...

Ryszard Kapuscinskiren *Ebano*; barruraino heldu zitzaidan eta Afrika asko estimatzen dut, gainera.



MAKILA MAGIKOA BANEUKA...

"Neuretzat erabiltzekotan, ondo ezkutatu nuke, eta behar dudun egunean atera; izan ere oso zoriontsua naiz"

AGM

6. Zu zeu, egon zara gura izan duzun leku guztietan?

Bai. Pribilegiatu bat naiz, bisitatu nahi izan ditudan leku guztiak bisitatu ditut: leku batera joateko gogoia izan dudanean, joan naiz. Azken bidaiak idazteko helburuarekin egin ditut.

7. Helmuga edozein dela ere, zer aholkatuko zenioke bidaiari bati?

Beti errespetuz jokatzeko. Jarra izan dadila ezer egin edo esan aurretik begiratzea, aztertzea, oso erreza da-eta hanka sartzea. Tentuz jokatu behar da beti.

8. Idazteaz gain, baduzu beste gustuko jardunik: opera abestea, esaterako.

Idazlea eta bidaiaria baino lehen, musikaria izan naiz, sei urterekin hasi nintzen-eta. Inoiz ez dut izan ogibide, baina hamar urte daramat nahiko serio abesten, lehen Bilbon eta orain Nafarroan. Bakarka ere banabil; primeran pasatzen dut.

9. Heziketa Fisikoko ikasketak dituzu eta pianoa ere ikasi zenuen. Kirola eta kultura ez dira aurkakoak?

Ez horixe! Gehitu egin behar da, ez biren artean aukeratu. Oso tristetia iruditzen zait bizitzan gauza bakarra izatea; bizitzak aprobeztatzeko gauza eder asko ditu.

10. Egongo da harrituko denik Basauriko batek euskaraz idazten duelako.

Hori ezjakintasuna da askotan: Basaurin milaka euskaldun daude, baina sakabanatuta.

BIHARAMUNA

XABIER ZUBIZARRETA



ad-ark-ad-ak

ruñean, honezkero, zezenek lehen adarkadak emanak dituzte; halere, tira: gora Sanfermin! Euskal Herri sufritu honek bere egunerokoan jaso behar izan dituenak ez dira makalagoak, ziurrenik. Eta zauriak zauri, biziraun egiten dugu; Sanferminak gure bizitza nazionalaren paradigma: adarkada batzuk jasoarren, ondo pasa. Izan ere, hainbeste urte, adostasun bila saiatu ondoren gure esku dagoela deskubritu dugu, baina Igeldo edota Itziar auzo ala herri gisa antolatuta behar diren erabaki ezinik gabiltza.

Eta zer pentsa, epaile espainol txit goren batek, euskal presoek ezarritako zigorrak, "berezi handiak, neurritz kanpokoak eta gainerakoekiko erabat desberdinak" izan direla eta "justizia ez da mendekua" esan eta 10 hiritar euskaldun, artean euskal presoan 4 abokatu, ETAko "frente juridikoa" osatzen dutela eta auziperatu egiten dituztenez? Justizia ez da mendekua, konforme, baina mendekua injustizia da. Israelen eta hemen;

.eus!!!; lorpen oso garrantzitsua euskal komunitatearentzat baina Uztaritzeko udalak, euskara hizkuntza ofizial deklaratzeko hartu duen erabakia indargabetzeko ekimenak hasi ditu Suprefetak.

Egia galanta, Mark Kurlansky-rena: "espainolek, (eta frantsek ere) euskaldunak beraiek bezalakoak izan daitezzen nahi dute". Ba ez; gu .eus.

Euskalduna

Hileta Zerbitzuak



BEILATOKIA • ETENGABEKO ZERBITZUA • LORE KOROAK
ESKELAK • TRAMITE GUZTIEN BIDERATZEA



Amilaga 39, Bergara • Tel./Faxa: 943 76 12 99 • e-posta: euskalduna@harrespil.net